

CURRENTA II.

A. D. 1865.

Epistola Eminentis. Cardinal. Jacobi Antonelli ac Syllabus præcipuorum aetatis Nostrae errorum.

Enormis strepitus ac tumultus, quocum suscepta et diformata fuerunt 2. Sedis Pontificiæ documenta a Redactoribus Ephemeridum Ecclesiae Catholicae infensis, i. e. Syllabus et Encyclica Sanctissimi Domini Nostri Pii IX. de 8. Dec. 1864. Vestras aures Venerabiles Fratres! qui nolitis huius temporis novellas, haud grate affecerat. Nacti enim estis novum documentum, quot et quanti veritatis osores in ipso Civitatum sinu reperiantur, qui omnem arripiunt occasionem, bellum, quod in universo terrarum orbe contra Ecclesiam catholicam geritur, eo fortioribus continuandi armis.

Nos quoque desuper consternati, summo cum desiderio anhelabamus ipsum Originale Prælaudatorum documentorum: Syllabi atque Encyclicae — quod quum una cum Epistola Eminentissimi Cardinalis Antonelli ab Excellentissima Nuntiatura Pontificia Viennensi ad Nos appulisset, nullam interponendam esse moram duximus, quin acta hæc tria ad notitiam Vestram pertingere faciamus.

Hæc 2 Ecclesiae munimenta, quæ ordine chronologico in Currentis sese excipient, ea qua par est, veneratione Fratres in Christo Dilecti! perlustrentur ac ruminentur oportet.

I. Epistola Eminentissimi

Cardinalis Jacobi Antonelli de 8. Dec. 1864. Syllabi concomitiva:

„Illustrissime et Reverendissime Domine!

Sanctissimus Dominus Noster Pius IX. Pontifex Maximus de animarum salute, ac de sana doctrina maxime sollicitus vel ab ipso sui Pontificatus exordio nunquam destitit suis Epistolis encyclicis, et Allocationibus in Consistorio habitis, et Apostolicis litteris in vulgus editis præcipuos huius præsertim infelicissimæ ætatis errores, ac falsas doctrinas proscribere et damnare. Cum autem forte evenire potuerit, ut omnia hæc Pontificia Acta ad singulos Ordinarios minime pervenerint, iccirco idem Summus Pontifex voluit, ut eorundem errorum Syllabus ad omnes universi catholici orbis Sacrorum Antistites mittendus conficeretur, quo iidem Antistites præ oculis habere possint omnes errores, ac perniciosas doctrinas, quæ ab ipso reprobatae, ac proscriptæ sunt. Mihi vero in mandatis dedit, ut hunc Syllabum typis editum ad Te, Illume ac Rume Domine, perferendum curarem hac occasione ac tempore, quo idem Pontifex Maximus pro summa sua de catholica Ecclesiæ, ac totius Dominici gregis